



東坡先生書傳卷第八

盤庚上第九

商書

盤庚五遷將治亳殷民咨胥怨作盤庚三篇

咨嗟也盤庚陽甲弟湯遷于亳仲丁遷于囂河亶甲
居相祖乙圮于耿而盤庚遷于殷

盤庚遷于殷民不適有居

祖乙圮于耿盤庚不得不遷而小人懷土故不肯適

新居

率籲衆感出矢言

籲呼也矢誓也盤庚知民怨故呼衆憂之人而告誓

之

曰我王來既爰宅于茲重我民無盡劉不能胥匡以生
卜稽曰其如台先王有服恪謹天命茲猶不常寧不常
厥邑于今五邦今不承于古罔知天之斷命矧曰其克
從先王之烈

爰於也劉殺也匡救也我先王祖乙既宅於耿耿圯
欲遷而不忍曰民勞矣無盡致之死然民終不能相
救以生乃稽之卜曰是圯者無若我何我先王自湯
以來奄有五服以謹天命之故猶不敢寧居遷者五
邦矣今若不承古而遷則天其斷棄我命況能從先

王之烈乎

若顛木之有由孽天其未我命于茲新邑紹復先王之
大業底綏四方

木之蠹病者雖勤於封殖不能使復遂茂顛仆也既
仆而孽生之然後有復盛之道不顛則無所從孽也
言天之欲復興殷必在新邑矣

盤庚敷於民由乃在位以常舊服正法度曰無或敢伏
小人之攸箴

敷教也由乃在位者教自有位而下也箴規也服事
也矇誦工諫士傳言庶人謗于市此先王之舊服正

法也今民敢相聚怨誹疑當立新法行權政以一切之威治之盤庚仁人也其下教于民者乃以常舊事而已言不造新令也以正法度而已言不立權政也曰無或敢伏小人之攸箴者憂百官有司逆探其意而禁民言也盤庚遷而殷復興用此道歟

王命衆悉至于庭王若曰

書凡言若曰者非盡當時之言大意若此而已

格汝衆予告汝訓汝猷黜乃心無傲從康

謀自抑黜其心無傲無懷安也

古我先王亦惟圖任舊人共政

此篇數言用耆舊又戒其侮老成以此推之凡不欲遷者皆衆穉且狂也盤庚言非獨我用舊先王亦用舊耳豈可違哉

王播告之脩不匿厥指王用丕欽罔有逸言民用丕變不仁者鄙慢其民曰民可與樂成難與慮始故爲一切之政若雷霆鬼神然使民不知其所從出其肯敷心腹腎腸以與民謀哉今吾布告民以所脩之政無所隱匿是大敬民也言之必可行無過也是以信而變從我也逸過也

今汝聒聒起信險膚予弗知乃所訟

險者利口相傾覆也孔子曰浸潤之譖膚受之愬不行焉可謂明也已矣巧言之入人如水之漸漬如病之自肌理入也是之謂膚今汝聒聒以險膚之言起信于人將誰訟乎

非予自荒茲德惟汝含德不惕予一人予若觀火予亦拙謀作乃逸

荒廣也猶詩曰遂荒大東書曰予荒度土功也含容也逸過也言汝妄造怨誹若非我自廣此德以遂其事但汝容使汝不惕畏我則我亦不仁矣如觀火作而不救能終不救乎終必撲滅之容爾而不問能終

不問乎終必誅絕之不忍于小而忍于大則是我拙謀成汝過也作成也

若網在綱有條而不紊若農服田力穡乃亦有秋網無綱縱之亂也農不力穡安於逸也

汝克黜乃心施實德于民至于婚友丕乃敢大言汝有積德乃不畏戎毒于遠邇

戎大也毒害也商之世家大族造言以害遷者欲以苟悅小民爲德也故告之曰是何德之有汝曷不施實德于汝民與汝婚友乎勞而有功此實德也汝能勞而有功則汝乃敢大言曰我有積德如此則汝自

得衆而多助豈復畏從我遠遷之大害乎
惰農自安不昏作勞不服田畝越其罔有黍稷
昏強也

汝不和吉言于百姓惟汝自生毒乃敗禍姦宄以自災
于厥身乃旣先惡于民乃奉其恫汝悔身何及

吉善也奉承也恫痛也汝今所施乃惡也非德也當
自承其疾痛

相時儉民猶胥顧于箴言其發有逸口矧予制乃短長
之命

儉民小人也小人尚顧箴規之言小人違箴言其禍

敗之發有過於口舌之相傾覆矧予制汝死生之命
而敢違之乎

汝曷弗告朕而胥動以浮言恐沈于衆
恐動沈溺于衆人也

若火之燎于原不可嚮邇其猶可撲滅則惟汝衆自作
弗靖非予有咎遲任有言曰人惟求舊器非求舊惟新
遲任古賢人言人舊則習器舊則敝當常使舊人用
新器我今所以從老成之言而遷新邑也

古我先王暨乃祖乃父胥及逸勤予敢動用非罰

我先王與汝祖父同其勞逸我其敢動用非法之罰

於其子孫乎

世選爾勞予不掩爾善茲予大享于先王爾祖其從與享之作福作災予亦不敢動用非德

古者功臣配食於大烝王言吾固欲選用功臣之子孫也然爾祖與先王同享于廟能作福作災者吾亦不敢動用非德之賞於其子孫也

予告汝于難若射之有志

志所射表的也射而無志則孰爲中孰爲否王事艱難當各分守無爲浮言當若射之有志後有以考其功罪也

汝無侮老成人無弱孤有幼

有又通猶言孤與幼也

各長于厥居勉出乃力聽予一人之作猷無有遠邇

汝無侮老弱幼各爲久居之計無有遠邇惟予所謀是從

用罪伐厥死用德彰厥善

有罪不伐則人將長惡不悛必死而後已故我薄刑小罪者以伐其當死者也

邦之臧惟汝衆邦之不臧惟予一人有佚罰凡爾衆其惟致告

國有不善則我有餘罪矣爾衆當盡以告我佚餘也
致盡也

自今至于後日各恭爾事齊乃位度乃口
度法也

罰及爾身弗可悔

盤庚中第十

商書

盤庚作惟涉河

作起也

以民遷乃話民之弗率

民之弗率不以政令齊之而以話言曉之此盤庚之

仁也

誕告用亶其有衆咸造勿褻在王庭

褻慢也

盤庚乃登進厥民曰明聽朕言無荒失朕命嗚呼古我
前后罔不惟民之承保后胥感鮮以不浮于天時

承敬也古者謂過曰浮浮之言勝也以敬民故民保
衛其后相與憂其憂雖有天時之災鮮不以人力勝
之也

殷降大虐先王不懷厥攸作視民利用遷

先王以天降災虐不敢懷安其所作而遷者視民利

而已

汝曷不念我古后之聞承汝俾汝惟喜康共非汝有咎比于罰

我古后所以敬汝使汝者喜與汝同安耳非爲有咎之日使汝同受其罰也

予若籲懷茲新邑亦惟汝故以丕從厥志

予所以招呼懷來新邑之人者亦惟以汝故也將使汝久居而安以大從我志

今予將試以汝遷安定厥邦汝不憂朕心之攸困乃咸大不宣乃心欽念以忱動予一人爾惟自鞠自苦若乘

舟汝弗濟臭厥載

困病也鞠窮也汝不憂我心之所病者乃不布心腹

敬念以誠動我但作怨誹以自窮苦譬如臨一作水

具一作乘舟能終不濟乎無遲留以臭敗其所載也

爾忱不屬惟胥以沈不其或稽自怒曷瘳

爾誠不能上達也但相與沈溺莫或考其利害者自怨自怒何損於病乎

汝不謀長以思乃災汝誕勸憂

汝不謀長策以慮患則是勸憂矣勸憂猶言樂禍也

今其有今罔後汝何生在上

東坡先生書傳 卷八
不謀其長有今而無後汝何以生於民上乎

今予命汝一

命汝一德一心也

無起穢以自臭

起穢者未能臭人先自臭也

恐人倚乃身迂乃心予迂續乃命于天予豈汝威用奉畜汝衆

出怨言者或愚人爲人所使故告之曰恐人倚託乃身以爲姦迂僻乃心俾迷惑失道予故導迎汝以續汝命于天予豈汝威哉以奉養汝衆而已

予念我先神后之勞爾先予丕克羞爾用懷爾然

爾之先祖有勳勞于湯故我大進用爾以懷爾也

失于政陳于茲高后丕乃崇降罪疾曰曷虐朕民

陳久也崇大也耿圯而不遷以病我民是失政而久于此也湯必大降罪疾于我以我爲虐民也

汝萬民乃不生暨予一人猷同心先后丕降與汝罪疾曰曷不暨朕幼孫有比

樂生興事則其生也厚是謂生生比同德也

故有爽德自上其罰汝汝罔能迪

非獨先后罰汝也汝有失德天其罰汝汝何道自免

乎

古我先后既勞乃祖乃父汝共作我畜民汝有戕則在乃心我先后綏乃祖乃父乃祖乃父乃斷棄汝不救乃死

則象也汝同我養民而有戕民之象見于心故爲鬼神之所斷棄也

茲予有亂政同位具乃貝玉乃祖乃父丕乃告我高后曰作丕刑于朕孫迪高后丕乃崇降弗祥

亂政猶言亂臣也具者多取而兼有之之謂也春秋傳曰昔平王東遷七姓從王牲用備具王賴之而賜

之駢旄之盟鄭子產曰我先君威公與商人皆出自周庸次比耦以艾殺此地斬之蓬蒿藜藿而共處之世有盟誓以相信也曰爾無我叛我無彊買母或勾奪爾有利市寶賄我勿與知蓋遷國危事也方道路之勤營築之勞寶賄暴露而貪吏擾之易以生變故於其將行先盟之鬼神曰凡我亂政同位之臣敢利汝貝玉則其父祖當告我高后而誅之不獨如此而已王亦自誓于衆曰朕不肩好貨又曰無總于貨寶丁寧如此所以儆百官而安民心此古者遷國之法也

鳴呼今予告汝不易未敬大恤無胥絕遠

遷國大憂也君臣與民一德一心而後可相絕遠則
殆矣

汝分猷念以相從

各分其事以謀之

各設中于乃心

中公平也

乃有不吉不迪

不吉凶人也不迪不道者也

顛越不恭

行險以犯上者

暫遇姦宄

劫掠行道為奸者也

我乃劓殄滅之

輕者劓之重者殄滅之

無遺育無俾易種于茲新邑往哉生生今予將試以汝
遷未建乃家

盤庚下第十一

商書

盤庚既遷奠厥攸居乃正厥位

郊廟朝社之位

東坡先生書傳 卷八
綏爰有衆曰無戲怠懋建大命

生者有以養死者有以葬祭勉立此大命也

今予其敷心腹腎腸歷告爾百姓于朕志罔罪爾衆爾無共怒協比讒言予一人古我先王將多于前功適于山用降我凶德嘉績于朕邦今我民用蕩析離居罔有定極爾謂朕曷震動萬民以遷

古我先王將求多於前人之功故卽於高原近山而居而天降此凶災之德我先王不卽遷者嘉與汝民共施功於我舊邦而民終不免流離無所定止我豈無故震動萬民以遷哉

肆上帝將復我高祖之德亂越我家

濟及我家也

朕及篤敬恭承民命用未地于新邑

我當及此時敬承上帝恤民之命以未居於新邑

肆予冲人非廢厥謀弔由靈各非敢違卜用宏茲賁

冲童也弔至也靈善也宏大也賁飾也我非敢不與衆謀但至用其善者自遷至於奠居無所不用卜以大此郊廟朝市之飾

嗚呼邦伯師長百執事之人尚皆隱哉

邦伯諸侯也師長公卿也隱閔也

東坡先生書傳 卷八
予其懋簡相爾

擇賢以助爾

念敬我衆朕不肩好貨敢恭生生鞠人謀人之保居叙
欽

肩任也不任好貨之人也敢果也恭者必慎果於利
慎於厚生之道也鞠人窮人也謀人富人也富則能
謀貧富相保而居各以其叙相敬也此教民厚生之
道也

今我既羞告爾于朕志若否罔有弗欽
若順我而遷者也不否不順者也

無總于貨寶

總聚也

生生自庸

各自用其厚生之道

式敷民德求肩一心

民不悅而猶爲之先王未之有也祖乙圯于耿盤庚
不得不遷然使先王處之則動民而民不懼勞民而
民不怨盤庚德之衰也其所以信於民者未至故紛
紛如此然民怨誹逆命而盤庚終不怒引咎自責益
開衆言反覆告諭以口舌代斧鉞忠厚之至此殷所

以不亡而復興也後之君子厲民以自用者皆以盤
庚藉口予不可以不論

說命上第十二

商書

高宗夢得說使百工營求諸野得諸傅巖作說命三篇
高宗武丁也帝小乙之子傅巖之野在虞虢之間
王宅憂諒陰三祀

諒信也陰默也居憂信任冢宰而不言

既免喪其惟弗言羣臣咸諫于王曰嗚呼知之曰明哲
明哲實作則

自知曰明知人曰哲

天子惟君萬邦百官承式

式法也

王言惟作命不言臣下罔攸稟命王庸作書以誥曰以
台正于四方台恐德弗類茲故弗言恭默思道夢帝賚
予良弼其代予言

信一夢而以天下之政授匹夫此事之至難者也武
丁恭默思道神交於上帝得良弼於夢中武丁自信
可也天下其孰信之故三年不言既免喪而猶默也
夫天子三年不言百官萬民莫不憂懼以待命若大
旱之望時雨也故一言而天下信之若神明然昔楚

莊王齊威王皆三年不出令而以一言致疆霸亦此道也恨其所得非傳說之流是以不王然亦可謂神而明之者矣

乃審厥象俾以形旁求于天下說築傅巖之野惟肖爰立作相

肖似也史記高宗得說與之語果聖人乃舉以爲相蓋非直以夢而已

王置諸其左右命之曰朝夕納誨以輔台德若金用汝作礪若濟巨川用汝作舟楫若歲大旱用汝作霖雨啓乃心沃朕心

渴其言也

若藥弗瞑眩厥疾弗瘳若跣弗視地厥足用傷

瞑眩憤耗也藥有毒者必瞑眩人所畏也跣不視地爲棘茨瓦礫所傷人所不畏也君子爲國有革弊去惡之政如用毒藥瞑眩非所畏也謀之不審慮之不周以敗國事如跣不視地以傷足乃所當畏也

惟暨乃僚罔不同心以匡乃辟俾率先王迪我高后以康兆民嗚呼欽予時命其惟有終說復于王曰惟木從繩則正后從諫則聖后克聖臣不命其承疇敢不祇若王之休命

說以匹夫得政而王虛心以待之者如此意其必有高世絕人之謀今其所以復於王者曰從諫而已大哉仁人之言約而至也唐太宗中主也其事父兄畜妻子正身治家有不正者多矣然所以致刑措其成功去聖人無幾者特以從諫而已說以爲此一言可以聖也故首進之以太宗觀之知從諫之可使狂作聖也

說命中第十三

商書

惟說命總百官乃進于王曰嗚呼明王奉若天道建邦設都樹后王君公承以大夫師長不惟逸豫惟以亂民爲天道也

古之天者皆言民也民不難出其力以食諸侯卿士以養天子者豈獨以逸樂之哉將使濟已也此所以爲天道也

惟天聰明惟聖時憲惟臣欽若惟民從乂未嘗視也而無不見未嘗聽也而無不聞此天聰明也而聖人法之

惟口起羞

多言數窮故吉人之辭寡

惟甲冑起戎

春秋傳曰無戎而城讎必保焉無故而好甲兵民疑

且畏致寇之道也

惟衣裳在笥

笥也篚也皆所以盛衣裳幣帛者也以貢曰篚以賜下曰笥趙簡子曰帝賜我二笥衣裳不藏之府庫而常在笥以待命而賜有功勸其不忘於進善也

惟干戈省厥躬

苗頑弗卽工帝其念哉是也

王惟戒茲允茲克明乃罔不休惟治亂在庶官官不及私昵惟其能爵罔及惡德惟其賢慮善以動動惟厥時有其善喪厥善矜其能喪厥功惟事事乃其有備有備

無患無啓寵納侮

小人有寵則慢其君故啓寵則納侮之道也

無恥過作非惟厥攸居政事惟醇

居不醇則駁雜之政也史佚曰無始禍無怙亂孔子曰無欲速無見小利顏淵曰無伐善無施勞其語不同此所謂立言者也譬之藥石米粟天下後世其皆以藉口今傳說之言皆散而不一一言一藥皆足以治天下之公患豈獨以訓武丁哉人至于今誦之也

黷于祭祀時謂弗欽禮煩則亂事神則難

高宗之祀豐數于近廟故說因以戒之也

王曰旨哉說乃言惟服

可服行也

乃不良于言予罔聞于行說拜稽首曰非知之艱行之惟艱王忱不艱允協于先王成德惟說不言有厥咎

說命下第十四

商書

王曰來汝說台小子舊學于甘盤既乃遯于荒野入宅于河自河徂亳暨厥終罔顯

古之君子明王之世而不肯仕蓋有之矣許由不仕堯舜夷齊不仕周商山之老不仕漢懷寶迷邦以終其身是或一道也武丁爲太子則學于甘盤武丁卽

位而甘盤遯去隱于荒野武丁使人求之迹其所徃則居河濱自河徂亳不知其所終武丁無與共政者故相說也舊說乃謂武丁遯于荒野武丁爲太子而遯決無此理遯則如吳太伯豈復立也哉學者徒見書云其在高宗時舊勞于外故以武丁爲遁小乙使武丁劬勞于外以知艱難決非荒野之遁又以書曰在武丁時則有若甘盤故謂武丁卽位而甘盤在也甘盤武丁師也蓋配食其廟其曰在武丁時固宜豈必卽位而後師之哉若武丁遁而復立不當云暨厥終罔顯也

東坡先生書傳 卷八
爾惟訓于朕志若作酒醴爾惟麴蘖若作和羹爾惟鹽梅

礪切磨已者也舟楫濟已者也霖雨澤民者也麴蘖鹽梅和而不同者也

爾交脩予罔予棄予惟克邁乃訓說曰王人求多聞時惟建事

學道將以見之行事也非獨知之而已

學于古訓乃有獲事不師古以克末世匪說攸聞惟學遜志務時敏厥脩乃來允懷于茲道積于厥躬

說既勉王以學又憂其所學者非道也故曰惟學遜

志遜之言隨也隨其所志而得之志於仁則所得於學者皆仁也志於義則所得於學者皆義也若志於功利則所得於學者皆功利而已智足以飾非辯足以拒諫皆學之力也敏於是則隨其所脩而至矣故必先懷仁義之道然後積學以成之

惟敦學半

王者之學且學且教既以教人因以脩其身其功半於學

念終始典于學厥德脩罔覺

積善如長不自覺也

監于先王成憲其永無愆惟說式克欽承旁招俊乂列于庶位王曰嗚呼說四海之內咸仰朕德時乃風股肱惟人良臣惟聖

以良臣惟聖猶以股肱惟人也

昔先正保衡

伊尹亦號保衡

作我先王乃曰予弗克俾厥后惟堯舜其心愧恥若撻于市一夫不獲則曰時予之辜佑我烈祖格于皇天爾尚明保予罔俾阿衡專美有商惟后非賢不乂惟賢非后不食其爾克紹乃辟于先王未綏民說拜稽首曰敢

對揚天子之休命

高宗彤日第十五

商書

高宗祭成湯有飛雉升鼎耳而雉祖已訓諸王作高宗彤日高宗之訓

此一篇亡

高宗彤日越有雉雉祖已曰惟先格王正厥事乃訓于王曰惟天監下民典厥義降年有未有不未非天天民民中絕命民有不若德不聽罪天既孚命正厥德乃曰其如台嗚呼王司敬民罔非天胤典祀無豐于昵祭之明日又祭殷曰彤周日繹雉號也格正也典常

也孚信也司主也胤嗣也昵親也繹祭之日野雉雊于鼎耳此爲神告王以宗廟祭祀之失審矣故祖己以謂當先格王心之非蓋武丁不專脩人事數祭以媚神而祭又豐於親廟儉於遠者敬其父薄其祖此失德之大者故傳說祖己皆先格而正之祖己之言曰天之監人有常義無所厚薄而降年有未有不未者非天天人人或以中道自絕于天也人有不順之德不聽之罪天未卽誅絕而以孽祥爲符信以正其德人乃不悔禍曰是孽祥其如我何則天必誅絕之矣今王專主於敬民而已數祭無益也夫先王孰非

天臨者常祀而豐于昵其可乎此理明甚而或者乃謂先王遇災異非可以象類求天意獨正其事而已高宗無所失德惟以豐昵爲過此乃諂事世主者言天人本不相與欲以廢洪範五行之說予以爲五行傳未易盡廢也書曰越有雉雉足矣而孔子又記其雊於耳非以耳爲祥乎而曰不可以象類求過矣人君於天下無所畏惟天可以儆之今乃曰天災不可以象類求我自視無過則已矣爲國之害莫大於此予不可以不論

西伯戡黎第十六

商書

殷始咎周

咎惡也

周人秉黎

秉勝也黎在上黨壺關

祖伊恐奔告于受作西伯戡黎

祖已後也受紂也帝乙子西伯文王也戡亦勝也

西伯既戡黎祖伊恐奔告于王曰天子天既訖我殷命

格人元龜罔敢知吉

人至於道爲格人其言與蓍龜同也

非先王不相我後人惟王淫戲用自絕故天棄我不有

康食不虞天性不迪率典

天棄我故天地鬼神無有安食於我者不虞天性者

父子之親不相虞度也不迪率典者五典之親不相

道率也

今我民罔弗欲喪曰天曷不降威大命不摯今王其如

台

摯驚也言天何不摯取王乎今王無若我何民不思

王如此

王曰嗚呼我生不有命在天祖伊及曰嗚呼乃罪多參
在上乃能責命于天

天子固有天命以保已今汝罪之聞於天者衆矣天將去汝豈可復責天以保已之命耶

殷之即喪指乃功不無戮于爾邦

功事也視汝所行之事雖邦人猶當戮汝而況於天乎孔子曰紂之不善不如是之甚也予乃今知之祖伊之諫盡言不諱漢唐中主所不能容者紂雖不改而終不怒祖伊得全則後世人主有不如紂者多矣

微子第十七

商書

殷既錯天命

錯亂也

微子作誥父師少師

微子紂兄也父師箕子紂之諸父少師比干也

微子若曰父師少師殷其弗或亂正四方我祖底遂陳于上

致成其法度以陳示後人

我用沈酗于酒用亂敗厥德于下殷罔不小大好草竊姦宄卿士師師非度

相師於非法

凡有辜罪乃罔恒獲小民方興相為敵讎今殷其淪喪若涉大水其無津涯殷遂喪越至于今日父師少師我

其發出狂吾家毫遜于荒今爾無指告予顛隳若之何其

我其奔走去國若狂人然吾家之耆老知紂之必亡而遜于荒野者多矣今爾無意告教我其若顛隳何父師若曰王子天毒降災荒殷邦方興先酗于酒乃罔畏畏

不畏其可畏者

弗其耇長舊有位人今殷民乃攘竊神祇之犧牲牲用以容將食無災

色純曰犧體完曰牲牛羊豕曰牲用器也盜天地宗

廟之牲器以相容匿且以祭器食而曰無災

降監殷民用乂讎斂召敵讎不怠

言殷之君臣下視其民若仇讎而聚斂之以此爲治力行不怠皆召敵讎之道也

罪合于一多瘠罔詔

瘠病也君臣爲一皆病矣無從告之者

商今其有災我興受其敗商其淪喪我罔爲臣僕

商之有災而未已也我起而正之則受其禍若其既已也我又無與爲臣僕者此所以佯狂而爲奴也

詔王子出迪我舊云刻于王子弗出我乃顛隳

刻害也箕子在帝乙時以微子長且賢欲立之而帝乙不可卒立紂紂忌此兩人故箕子曰子之出固其道也我舊所云者害子子若不出則我與子皆危矣自靖

靖安也微子之告箕子若欲與之皆去然箕子曰吾三人者各行其志自用其心之所安者而已

人自獻于先王

人各自以其意貢于先王微子以去之爲續先王之國箕子以爲之奴爲全先王之嗣比干以諫而死爲不負先王也

我不顧行遯

不念與汝皆行也

東坡先生書傳卷第八終

東坡先生書傳卷第九

泰誓上第一

周書

惟十有一年武王伐殷一月戊午師渡孟津作泰誓三篇

文王受命九年而崩武王以大統未集故卽位而不
改元十一年喪畢觀兵於商而歸至十三年乃復伐
商叙所謂十一年武王伐殷者觀兵之事也所謂一
月戊午師渡孟津作泰誓者十三年之事也而并爲
一年言之疑叙文有闕誤

惟十有三年春大會于孟津王曰嗟我友邦冢君越我

東坡先生書傳 卷九
御事庶士明聽誓

天子有友諸侯之義冢大也御治也

惟天地萬物父母惟人萬物之靈亶聰明作元后元后作民父母今商王受弗敬上天降災下民沈湎冒色敢行暴虐罪人以族官人以世

孥戮湯事也而罪人以族則爲紂罪賞延于世舜德也而官人以世則爲紂惡者湯之孥戮徒言之而不用舜之賞延非官人也

惟宮室臺榭陂池侈服以殘害于爾萬姓焚炙忠良剝剔孕婦皇天震怒命我文考肅將天威大勳未集肆予

小子發以爾友邦冢君觀政于商

或曰武王觀政于商欲紂改過不幸而不悛若其悛也則武王當復北面事之歟曰否文王武王之王也久矣紂若改過不過存其社稷宗廟而封諸商使爲二王後也以爲武王退而示弱固陋矣而曰復北面事之者亦過也

惟受罔有悛心乃夷居

安居自若也

弗事上帝神祇遺厥先宗廟弗祀犧牲粢盛旣于凶盜乃曰吾有民有命罔懲其侮天佑下民作之君作之師

東坡先生書傳 卷九
惟其克相上帝寵綏四方有罪無罪予曷敢有越厥志
同力度德同德度義

力均以德德均以義則知勝負矣

受有臣億萬惟億萬心予有臣三千惟一心商罪貫盈
天命誅之予弗順天厥罪惟鈞予小子夙夜祗懼受命
文考類于上帝宜于冢土

冢土社也祭社曰宜

以爾有衆底天之罰天矜于民民之所欲天必從之爾
尚弼予一人永清四海時哉弗可失

泰誓中第二

周書

惟戊午王次于河朔羣后以師畢會王乃徇師而誓曰
西土有衆咸聽朕言我聞吉人爲善惟日不足凶人爲
不善亦惟日不足今商王受力行無度播棄黎老昵比
罪人淫酗肆虐臣下化之朋家作仇脅權相滅無辜顛
天穢德彰聞惟天惠民惟辟奉天有夏桀弗克若天流
毒下國天乃佑命成湯降黜夏命惟受罪浮于桀剝喪
元良

剝落也喪去也古者謂去國爲喪元良微子也微子
紂之同母兄而謂之庶子不得立者生於帝乙未卽
位之前也以禮言之當與紂均爲嫡子而微子長故

成王命之曰殷王元子

賊虐諫輔

比干也

謂已有天命謂敬不足行謂祭無益謂暴無傷厥監惟不遠在彼夏王天其以予乂民朕夢協朕卜

高宗言夢文王武王言夢孔子亦言夢者其情性治其夢不亂

襲于休祥戎商必克受有億兆夷人離心離德予有亂臣十人同心同德

夷人平民也古今傳十人爲文母周公太公召公畢

公榮公太顛閔天散宜生南宮括孔子曰有婦人焉九人而已

雖有周親不如仁人

十人之中雖有周召之親然皆仁人非以親用也

天視自我民視天聽自我民聽百姓有過在予一人今天朕必往我武維揚侵于之疆取彼凶殘我伐用張于湯有光

湯放桀而有慙德今我亦爲之湯不媿矣

勗哉夫子罔或無畏寧執非敵百姓懍懍若崩厥角

勗勉也戒民無輕敵寧執是心曰我不足以敵紂民

東坡先生書傳 卷九
四
畏紂之虐若崩厥角也

嗚呼乃一德一心立定厥功惟克永世

泰誓下第三

周書

時厥明

戊午之明日也

王乃大巡六師明誓衆士王曰嗚呼我西土君子天有顯道厥類惟彰

天有明人之道明其類德者

今商王受狎侮五常

五常五典也狎侮五典以人倫爲戲也

荒怠弗敬自絕于天結怨于民斲朝涉之脛剖賢人之心作威殺戮毒痛四海

痛病也

崇信姦回放黜師保屏棄典刑囚奴正士郊社不脩宗廟不享作奇技淫巧以悅婦人上帝弗順祝降時喪

祝斷也

爾其孜孜奉予一人恭行天罰古人有言曰撫我則后虐我則讎獨夫受洪惟作威乃汝世讎樹德務滋除惡務本

滋廣也言止取紂也

肆予小子誕以爾衆士殄殲乃讎爾衆士其尚迪果殺
以登乃辟功多有厚賞不迫有顯戮嗚呼惟我文考若
日月之照臨光于四方顯于西土惟我有周誕受多方
予克受非予武惟朕文考無罪受克予非朕文考有罪
惟予小子無良

兵凶事也以武王與紂猶有勝負之憂爲文王羞是
以先王重用兵也

牧誓第四

周書

武王戎車三百兩虎賁三百人

虎賁猛士也若虎之奔獸

與受戰于牧野作牧誓

春秋晉與楚戰皆七八百乘武王能以三百乘三百
人克紂者其德與政皆勝且諸侯之兵助之者衆也
時甲子昧爽王朝至于商郊牧野
在朝歌南

乃誓王左杖黃鉞右秉白旄以麾

黃鉞以金飾也軍中指麾白則見遠王無自用鉞之
理以爲儀耳故左杖黃鉞麾非右手不能故右秉白
旄此事理之常本無異說而學者妄相附致張爲議
論皆非其實凡若此者不取

曰逃矣西土之人

逃遠也

王曰嗟我友邦冢君御事司徒司馬司空

御事治事也指此三卿也六卿止言三古者官不必備或三公兼之

亞旅師氏

亞旅衆大夫其位次卿師氏亦大夫主以兵守門

千夫長百夫長及庸蜀羌髳微盧彭濮人

春秋傳楚饑庸與百濮伐之庸上庸縣濮卽百濮也又楚伐羅羅與盧戎兩軍之蓋南蠻之屬楚者羌先

零罕开之屬彭今屬武陽有彭亡髳微闕則知此數國皆西南之夷

稱爾戈比爾干立爾矛予其誓王曰古人有言曰牝雞無晨牝雞之晨惟家之索今商王受惟婦言是用昏棄厥肆祀弗答

肆祀所陳祭祀也祀所以報也故謂之答

昏棄厥遺王父母弟不迪

王父母及母弟皆先王之遺胤不以道遇之也

乃惟四方之多罪逋逃是崇是長是信是使是以爲大夫卿士俾暴虐于百姓以姦宄于商邑今予發惟恭行

東坡先生書傳 卷九
天之罰今日之事不愆于六步七步乃止齊焉夫子勗哉不愆于四伐五伐六伐七伐乃止齊焉

孫武言用兵其勢險其節短故不過六步七步四伐五伐六伐七伐必少休而整齊之伐擊刺也

勗哉夫子尚桓桓如虎如貔如熊如羆于商郊弗迓克奔以役西土

紂師能來奔者勿復迎擊以勞役我西土之人

勗哉夫子爾所弗勗其于爾躬有戮

武成第五

周書

武王伐殷往伐歸獸識其政事作武成

自往伐至歸牛馬皆記之

惟一月壬辰旁死魄越翼日癸巳王朝步自周于征伐

商厥四月哉生明王來自商至于豐

壬辰未有事先書旁死魄者記月之生死使千載之

日後世可考也曆法以月起故書多記生死朏望皆

先事而書所以正曆也

乃偃武脩文歸馬于華山之陽放牛于桃林之野示天

下弗服

華山之陽有山川焉然地至險絕可入而不可出桃

林之野在華山東亦險阻歸馬牛於此示天下弗服

也春秋傳曰天生五材民並用之闕一不可誰能去
兵兵不可去則牛馬不可無雖堯舜之世牛馬之政
不可不脩而武王歸馬休牛倒載干戈包之虎皮示
不復用者蓋勢有不得不然者也夫以兵雄天下殺
世主而代之雖盛德所在懼者衆矣武庚紂子也殺
其父用其子付之以殷民武王知其必叛矣然必用
之紂子且用況其餘乎所以安諸侯之懼也楚靈王
旣縣陳蔡朝諸侯卜曰當得天下民患王之無厭也
故從亂如歸知伯夫差皆以此亡戰勝而不已非獨
諸侯懼也吾民先叛矣湯武皆畏之故湯以慙德令
諸侯曰慄慄危懼若將隕于深淵其敢復言兵乎武
王之偃武則湯之慙德也秦漢惟不知此故始皇不
及一世而天下亂漢雖不亡然諸侯功臣皆叛高祖
以流矢崩不偃武之過也

丁未祀于周郊邦甸侯衛駿奔走執豆邊越三日庚戌
柴望大告武成旣生魄庶邦冢君暨百工受命于周王
若曰嗚呼羣后惟先王建邦啓土公劉克篤前烈至于
大王肇基王迹王季其勤王家

先王當作先公后稷也或曰先王謂舜也舜始封后
稷於郃公劉后稷曾孫鞠之子太王后稷十二世孫

公叔祖類之子謂古公亶父也其子王季謂季歷也
我文考文王克成厥勳誕膺天命以撫方夏大邦畏其
力小邦懷其德惟九年大統未集

文王以虞芮質厥成之歲改元九年而崩

予小子其承厥志底商之罪告于皇天后土所過名山
大川曰惟有道曾孫周王發

有道指其父祖也

將有大正于商今商王受無道暴殄天物害虐烝民爲
天下逋逃主萃淵藪

天下有罪而逃歸紂者紂皆主之藏如淵藪之聚鳥

獸也

予小子既獲仁人

謂亂臣十人

敢祗承上帝以遏亂畧華夏蠻貊罔不率俾恭天成命
肆予東征綏厥士女惟其士女篚厥玄黃昭我周王天
休震動用附我大邑周惟爾有神尚克相予以濟兆民
無作神羞既戊午師渡孟津癸亥陳于商郊俟天休命
甲子昧爽受率其旅若林會于牧野罔有敵于我師前
徒倒戈攻于後以北血流漂杵

紂師自相攻至血流漂杵非武王之罪然孟子不取

者謂其應兵也惡其以此自多而言之也

一戎衣天下大定乃反商政政由舊釋箕子囚封比干墓式商容閭

商容賢者而紂不用車過其閭式以禮之

散鹿臺之財發鉅橋之粟大賚于四海而萬姓悅服

非獨以惠民亦以示不復用兵也

列爵惟五

公侯伯子男

分土惟三

公侯百里伯七十里子男五十里自孟子王制皆云

爾此周制也鄭子產言列國一同今大國數圻若無
侵小何以至焉而周禮乃曰公之地五百里侯四百
里伯三百里子二百里男百里凡五等禮曰封周公
於曲阜地方七百里皆妄也先儒以謂周衰諸侯相
并自以國過大違禮乃除滅舊文而爲此說獨鄭玄
之徒以謂周初因商三等其後周公攘戎狄斥廣中
國大封諸侯夫攘戎斥地能拓邊耳自荒服以內諸
侯固自如也周公得地于邊而增封于內非動移諸
侯遷其城郭廟社安能增封乎知玄之妄也而近歲
學者必欲實周禮之言則爲之說曰公之地百里而

東坡先生書傳卷第九終
已五百里者并附庸言之夫以五百里之地公居其一而附庸居其四豈有此理哉予專以書孟子王制及鄭子產之言考之知周禮非聖人之全書明矣建官惟賢位事惟能重民五教惟食喪祭惇信明義崇德報功垂拱而天下治

東坡先生書傳卷第九終

東坡先生書傳卷第十

洪範第六

周書

武王勝殷殺受立武庚以箕子歸作洪範

洪範大法也武王殺受立武庚非所以問洪範者而

孔子於此言之明武王之得箕子蓋師而不臣也箕

子之言曰殷其淪喪我罔為臣僕殷亡則箕子無復

仕之道以此表正萬世為君臣之法如伯夷叔齊之

志也箕子之道德賢於微子而況武庚乎武王將立

殷後必以箕子為首微子次之而卒立武庚者必二

子辭焉武庚死而立微子則是箕子固辭而不可立

也太史公曰武王封箕子朝鮮而不臣也非五服之外賓客之國則箕子不可得而侯也然則曷為為武王陳洪範也天以是道畀禹而傳至于箕子不可使自我而絕也以武王而不傳則天下無復可傳者矣故為箕子之道者傳道則可仕則不可此孔子叙書之意也

惟十有三祀王訪于箕子

商曰祀周曰年在周而稱祀亦箕子不事周之意

王乃言曰嗚呼箕子惟天陰隲下民相協厥居我不知其彝倫攸叙

隲升彝常也倫理也天人有相通之道若顯然而通之以交於天地鬼神之間則家為巫史矣故堯命重黎絕地天通惟達者為能默然而心通也謂之陰隲君子而不通天道則無以助民而合其居矣故武王以天人常類之次訪箕子

箕子乃言曰

乃言曰難之也王虛心而後問箕子辭讓而後對也我聞在昔鯀陞洪水汨陳其五行帝乃震怒不畀洪範九疇彝倫攸斁鯀則殛死禹乃嗣興天乃錫禹洪範九疇彝倫攸叙

汨亂也九疇如草木之區別也數厭也執一而不知
變鮮不厭者孔子曰克伐怨怒不行焉可謂仁矣好
勝之謂克治民而求勝民者必亡治病而求勝病者
必殺人堯謂鯀方命圯族楚詞云鯀矯直以亡身知
其剛愎好勝者也五行土勝水鯀知此而已不通其
變夫物之方壯不達其怒而投之以其所畏其爭必
大豈獨水哉以其極死知帝之震怒也舊說河出圖
洛出書河圖爲八卦洛書爲九疇其傳也尚矣學者
或疑而不敢言以予觀之圖書之文必粗有八卦九
疇之象數以發伏羲與禹之知如春秋之以麟作也

豈可謂無也哉

初一日五行

無所不用五行故不言用

次二曰敬用五事次三曰農用八政

農厚也

次四曰協用五紀次五曰建用皇極次六曰又用三德

次七曰明用稽疑次八曰念用庶徵次九曰嚮用五福

威用六極

嚮趨也用福極使人知所趨避也

一五行一曰水二曰火三曰木四曰金五曰土

此五行生數也生成之數解見易傳

水曰潤下火曰炎上木曰曲直金曰從革土爰稼穡
皆其德也水不潤下則不能生物故水以潤下爲德
火不炎上則不能熟物故火以炎上爲德木曰曲
直謂其能從繩墨也木不曲直則不能棟宇故木以
曲直爲德金曰從革謂其能就鎔範也金不變化則
不能成器故金以從革爲德土無所不用不可以一
德名而其德盛於稼穡不曰曰而曰爰爰於也曰者
所以名之也無成名無專氣無定位蓋曰於此稼穡
而非所以名之也

潤下作鹹炎上作苦曲直作酸從革作辛稼穡作甘
五行之所作不可勝言也可言者聲色臭味而已人
之用是四者惟味爲急故舉味以見其餘也

二五事一曰貌二曰言三曰視四曰聽五曰思貌曰恭
言曰從視曰明聽曰聰思曰睿恭作肅從作又明作哲
聰作謀睿作聖

人生而有耳目口鼻視聽言思之具有知而外有
容與生俱生者也今五事先貌而次言然後有視聽
已而乃有思何也人之生也五事皆具而未能用也
自其始孩而貌知恭見其父母匍匐而就之擊蹠而

禮之是貌恭者先成也稍長而知言語以達其意故
言從者次之於是始有識別而目乃知物之美惡耳
乃知事之然否於是而致其思無所不至矣故視明
聽聰思睿者又次之睿者達也窮理之謂也貌恭而
人畏之謂之肅言從而民服之謂之又視明而不爲
色所眩謂之哲聽聰而不爲言所移謂之謀致思自
窮理盡性以至於命謂之聖此天理之自然由匹夫
而爲聖人之具也聖人以爲此五者之事可以交天
人之際治陰陽之變山川之有草木如人之有容色
威儀也故貌爲木而可以治雨金之聲如人之有言

也故言爲金而可以治暘火之外景如人之有目也
故視爲火而可以治燠水之內景如人之有耳也故
聽爲水而可以治寒土行於四時金木水火得之而
後成如人心之無所不在也故思爲土而可以治風
此洪範言天人之大略也或曰五事之叙與五行之
叙異蓋從其相勝者是殆不然聖人叙五事專以人
事之理爲先後如向所云者其合於五勝適會其然
耳從而爲之說則過矣

三八政一曰食二曰貨三曰祀四曰司空五曰司徒六
曰司寇七曰賓八曰師

食爲首貨次之祀次之食貨所以養生而祀所以事死也生死之理得則司空定其居居定而後可教既教而後可誅故司空司徒司寇次之所以治民者至矣然後治諸侯治諸侯莫若禮所以賓之者備矣而猶不服則兵可用故賓而後師

四五紀一曰歲

歲星所次也

二曰月

月所躔也

三曰日

日所在也

四曰星辰

星二十八宿辰十二次也星辰者歲月日之所行也此四者所以授民時也

五曰曆數

以曆授民時則并彼四者爲一矣豈復與彼四者列而爲五哉予以是知曆者授民時者也數者如陽九百六之類聖人以是前知吉凶者也書曰天之曆數在爾躬

五皇極

大而無際謂之皇莊子曰無門無旁四達之皇皇至而無餘謂之極子思子曰喜怒哀樂之未發謂之中道有進此者乎故曰極亦曰中孔子曰過猶不及學者因是以謂中者過與不及之間之謂也陋哉斯言也瞶者之言不粗則微何也耳之官廢則粗微之制不在我也聰者之言無粗微豈復擇粗微之間而後言乎中則極極則中中極一物也學者知此則幾矣皇建其有極

大立是道以爲民極

歛時五福用敷錫厥庶民惟時厥庶民

我有是道五福自至可以錫庶民矣

于汝極

我有是道則民皆取中于我

錫汝保極

我有是道則民皆保我以安我以五福錫民民以保安錫我

凡厥庶民無有滯朋人無有比德惟皇作極凡厥庶民有猷有爲有守汝則念之不協于極不罹于咎皇則受之而康而色曰予攸好德汝則錫之福時人斯其惟皇之極無虐烝獨而畏高明人之有能有爲使羞其行而

邦其昌凡厥正人既富方穀汝不能使有好于而家時人斯其辜于其無好德汝雖錫之福其作汝用咎

皇極之道大矣無所不受無所不可苟非淫朋比德自棄於邪者皆可受而成就之與作極也有猷者有謀慮者也有爲者有材力者也有守者有節守者也皆可與作極者也汝則念之勿忘也雖不協于極而未麗於惡者汝則受之勿棄也有自言者曰我所好者德也雖真僞未可知汝則錫之福則人知爲善之利斯大作極矣虐斃獨而畏高明則人慕富貴厭貧賤利不在於爲善矣人之有能有爲皆得自進而邦

乃昌雖正人亦有見而後仁既富而後爲善者汝知其不邪斯可進矣不必待其有善而後祿也汝見正人而不能進使與汝國家相好則此正人亦或去而爲惡也于其無好德者所謂淫朋比德自棄於邪者也斯人而錫之福則汝亦有咎矣大哉皇極之道非大人其孰能行之嗚呼此固經經者之所大笑也歟不協于極而受之自言好德而信之必有欺我而敗事者矣然得者必多失者必少唐武氏之無道也獨於進人無所留難非徒人得薦士亦許自舉其材其後開元賢臣致刑措者皆武氏所收也德宗好察而

多忌士無賢愚皆不得進國空無人以致奉天之禍故陸贄有言武后以易得人而陛下以精失士至哉斯言也昔常袞爲相艱於進人賢愚同滯及崔祐甫代之未朞年除吏八百多其親舊其曰非親舊莫由知之若祐甫與贄真可與論皇極者也

無偏無陂遵王之義無有作好遵王之道無有作惡遵王之路無偏無黨王道蕩蕩無黨無偏王道平平無反無側王道正直會其有極歸其有極

偏陂反側而作好惡此最害皇極者皇極無可作可作非皇極也去其害皇極而已

曰皇極之敷言是彝是訓于帝其訓

天之錫禹九疇不能如是諄諄也蓋粗有象數而已禹箕子推而廣之至皇極尤詳曰此非皆帝之言也皇極之敷言也帝以數象告而我敷廣其言爲彝訓亦與帝言無異故曰于帝其訓

凡厥庶民極之敷言是訓是行以近天子之光曰天子作民父母以爲天下王

皇極非獨天子事也使庶人而能訓行此敷言者其功烈豈可勝言哉亦足以附益天子之光明且能使其民愛其君如父母也

東坡先生書傳 卷十 九
六三德一曰正直二曰剛克三曰柔克平康正直彊弗友剛克變友柔克

不剛不柔曰正直孔子曰以直報怨平安無事用正直而已變和也過彊不順者則以剛勝之人治之和順者則以柔順之人養之所謂剛亦不吐柔亦不茹也

沈潛剛克高明柔克

沈潛地也坤至柔而動也剛是以剛勝也高明天也天爲剛德猶不干時是以柔勝也坤六二直方大乾上九元龍有悔臣當執剛以正君君當體柔以納臣

也

惟辟作福惟辟作威惟辟玉食臣無有作福作威玉食臣之有作福作威玉食其害于而家凶于而國人用側頗僻民用僭忒

聖人之憂世深矣其言世爲天下則旣陳天地君臣剛柔之道矣則憂後世因是以亂君臣之分故復深戒之

七稽疑擇建立卜筮人

將與卿士皆謀及之其可不擇而立乎

乃命卜筮

卜筮必命此人不使不立者占也

曰雨

其兆如雨

曰霽

如雨止

曰蒙

如蒙霧

曰驛

兆絡驛不相屬

曰克

兆相錯入也

曰貞曰悔

春秋傳曰秦伯伐晉卜徒父筮之遇蠱曰蠱之貞風也其悔山也是內卦為貞外卦為悔也卦之不受者占卦而不占爻故用貞悔占者變者則止以所變之爻占之其謂之貞悔者古語如此莫知其訓也

凡七卜五占用二衍忒

衍推也忒過也謂變而適他卦者也卜用其五占也於二曰貞曰悔此其不變者耳又當推其變者皆占之

立時人作卜筮三人占則從二人之言

既立此人爲卜筮矣則當信而從之其占不同則當從衆

汝則有大疑謀及乃心謀及卿士謀及庶人

聖人無私之至視其心與卿士庶人如一皆謀及之周禮有外朝致民之法然上酌民言聽輿人之誦皆謀及之道也

謀及卜筮汝則從龜從筮從卿士從庶民從是之謂大同身其康彊子孫其逢吉汝則從龜從筮從卿士逆庶民逆吉卿士從龜從筮從汝則逆庶民逆吉庶民從龜

從筮從汝則逆卿士逆吉汝則從龜從筮逆卿士逆庶民逆作內吉作外凶龜筮共違于人用靜吉用作凶

內祭祀昏冠之類外出師征伐之類

八庶徵曰雨曰暘曰燠曰寒曰風曰時

貌木也其徵爲雨言金也其徵爲暘視火也其徵爲燠聽水也其徵爲寒思土也其徵爲風聖人何以知之以四時知之也四時之氣木爲春春多雨故雨爲貌徵金爲秋秋多旱故暘爲言徵火爲夏夏多燠故燠爲視徵水爲冬冬多寒故寒爲聽徵土爲四季而風行於四時故風爲思徵箕子既叙此五徵矣則又

有曰時者明此五徵以四時五行推知之也

五者來備各以其叙庶草蕃廡一極備凶一極無凶

備者皆有而不過也極備者過多也極無者過少也

此五者有一如此則皆凶也

曰休徵曰肅時雨若曰乂時暘若曰哲時燠若曰謀時

寒若曰聖時風若曰咎徵曰狂恒雨若

貌不肅則狂

曰僭恒暘若

言不從則僭僭不信也

曰豫恒燠若

視不哲則豫豫淫樂於色也

曰急恒寒若

聽不聰則曰急急過察也

曰蒙恒風若

思不睿則蒙蒙暗也

曰王省惟歲

自此以下皆五紀之文也簡編脫誤是以在此其文當在五曰曆數之後莊子曰除日無歲王省百官而不兼有司之事如歲之總日月也

卿士惟月師尹惟日

卿士亦不侵師尹之職也

歲月日時無易百穀用成又用明俊民用章家用平康
日月歲時既易百穀用不成又用昏不明俊民用微家
用不寧

歲月日時相奪則百穀不成君臣相侵則治不明俊
民微而家不寧

庶民惟星星有好風星有好雨日月之行則有冬有夏
月之從星則以風雨

箕好風畢好雨月在箕則多風在畢則多雨言歲之
寒燠由日月其風雨由星以明卿士之能爲國休戚

庶民之能爲君禍福也

九五福一曰壽二曰富三曰康寧

無疾病

四曰攸好德

作德心逸日休其爲福也大矣

五曰考終命六極

極窮也

一曰凶短折

不得其死曰凶

二曰疾

多疾病

三曰憂

人有常戚戚者亦命也

四曰貧五曰惡

醜陋也

六曰弱

疋劣也福之反則極也極之對則福也五與六豈其
盡之皇極之建則多福不建則多極皆其大略也必
曰何以致之則過矣

武王既勝殷邦諸侯班宗彝作分器

宗彝宗廟彝尊也以爲諸侯分器一篇亡

東坡先生書傳卷第十終



